



**ՀՀ ԱՐԴՅՈՒՆԱՀԱՆՈՂ ՃՅՈՒՂԵՐԻ ԹԱՓԱՆՑԻԿՈՒԹՅԱՆ  
 ՆԱԽԱՁԵՌՆՈՒԹՅԱՆ ԲԱԶՄԱՇԱՀԱՌՈՒ ԽՄԲԻ  
 ԱՇԽԱՏԱՆՔԱՅԻՆ ՆԻՍՏԻ ԱՐՁԱՆԱԳՐՈՒԹՅՈՒՆ N 8**

06.12.2017թ. | Ժամը 11:00-13:30 | «Իբիս» հյուրանոց, Երևան

**Մասնակիցներ՝ Բազմաշահառու խմբի անդամներ**

|   |   |   |
|---|---|---|
| <b>Նախագահող՝</b>                         | Դավիթ Հարությունյան                             | ՀՀ արդարադատության նախարար  |
|   | Վարդան Գևորգյան                                 | ՀՀ էներգետիկ ենթակառուցվածքների և բնական պաշարների նախարարի տեղակալ   |
|   | Տիգրան Խաչատրյան                                | ՀՀ տնտեսական զարգացման և ներդրումների նախարարի տեղակալ  |
|   | Կարեն Իսախանյան                                 | ՀՀ տարածքային կառավարման և զարգացման նախարարի տեղակալ   |
|   | Խաչիկ Հակոբյան                                  | ՀՀ բնապահպանության նախարարի տեղակալ   |
|   | Արմեն Ստեփանյան                                 | «Լիդիան Արմենիա» ՓԲԸ-ի կայուն զարգացման գծով ավագ կառավարիչ   |
|   | Վահե Վարդանյան                                  | «Գեոմայնինգ» ՍՊԸ-ի գլխավոր տնօրեն   |
|   | Արթուր Համբարձումյան<br>(ԲՇԽ Ժամանակավոր անդամ) | «Հասարակական ձայն» («ՍիվիլՎոյս») հասարակական կազմակերպության խորհրդի անդամ  |
|   | Ինգա Զարաֆյան                                   | «Էկոլուր» տեղեկատվական հասարակական կազմակերպության նախագահ  |
|   | Հարություն Մովսիսյան                            | Երևանի պետական համալսարանի Օգտակար հանածոների հանքավայրերի որոնման և հետախուզման ամբիոնի դոցենտ, Կայուն զարգացման կենտրոնի փորձագետ |
|   | Արթուր Գրիգորյան                                | «Էկոհրավունք» հասարակական կազմակերպության նախագահ   |
| <b>Ներկաներ՝<br/>տեսակապի<br/>միջոցով</b> | Արթուր Նիկողոսյան                               | «Ագարակի պղնձամոլիբդենային կոմբինատ» ՓԲԸ-ի գլխավոր տնօրենի խորհրդական   |

## ՀՀ կառավարության աշխատակազմ

|                   |                   |   |
|-------------------|-------------------|---|
|                   | Լիլիա Շուշանյան   | ՀՀ կառավարության աշխատակազմի «Հանքարդյունաբերության ոլորտի թափանցիկության բարելավում» ծրագրի ղեկավար  |
|                   | Լուսինե Թովմասյան | ՀՀ կառավարության աշխատակազմի «Հանքարդյունաբերության ոլորտի թափանցիկության բարելավում» ծրագրի փորձագետ |
|                   | Դավիթ Շինոյան     | ՀՀ կառավարության աշխատակազմի «Հանքարդյունաբերության ոլորտի թափանցիկության բարելավում» ծրագրի փորձագետ |
| <b>Հյուրեր՝</b>   | Դեբորա Գրիգեր     | ԱՄՆ միջազգային զարգացման գործակալություն (ՄՋԳ)  |
|                   | Անահիտ Խաչատրյան  | ԱՄՆ ՄՋԳ   |
|                   | Դմիտրի Մարիասին   | ՄԱԿ-ի զարգացման ծրագիր  |
|                   | Արմեն Մարտիրոսյան | ՄԱԿ-ի զարգացման ծրագիր  |
|                   | Փույա Նոշադի      | Գերմանական միջազգային համագործակցություն  |
|                   | Լիլիթ Մուրադյան   | Հայաստանի ամերիկյան համալսարանի պատասխանատու հանքարդյունաբերության կետրոն (ՀԱՀ ՊՀԿ)                   |
|                   | Կառլ Ուլբրիխտ     | ՀԱՀ ՊՀԿ   |
|                   | Դավիթ Հակոբյան    | ՀԱՀ ՊՀԿ   |
|                   | Նարինե Թադևոսյան  | Համաշխարհային բանկի գրասենյակ   |
|                   | Կարեն Զադոյան     | Հայաստանի երիտասարդ իրավաբանների ասոցիացիա  |
|                   | Մարատ Ատոմյան     | Հայաստանի երիտասարդ իրավաբանների ասոցիացիա  |
|                   | Մարիամ Զադոյան    | Հայաստանի երիտասարդ իրավաբանների ասոցիացիա  |
|                   | Դավիթ Սարգսյան    | Վերակառուցման և զարգացման եվրոպական բանկ (ՎՋԵԲ)   |
| <b>Բացականեր՝</b> | Դավիթ Անանյան     | ՀՀ ֆինանսների նախարարի տեղակալ  |
|                   | Պերճ Խաչատրյան    | «Զանգեզուրի պղնձամոլիբդենային կոմբինատ» ՓԲԸ-ի իրավաբանական դեպարտամենտի                               |

Սոնա Այվազյան

«Թրանսփարենսի Ինթերնեշնլ» հակակոռուպցիոն կենտրոնի գործադիր տնօրեն

**Արձանագրողներ՝**

Լուսինե Թովմասյան

Դավիթ Շինոյան

## ՕՐԱԿԱՐԳԻ ՀԱՐՑԵՐ

### 1. ՀՀ ԱՃԹՆ-ի բազմաշահառու խմբի (ԲՇԽ-ի) նիստի բացում

**Դ. Հարությունյանը** ողջունեց նիստի մասնակիցներին և նշեց, որ ԲՇԽ-ի պաշտոնական նիստը կազմակերպվեց նախատեսվածից ուշ, քանի որ նախքան նիստը իրականացվել են մի քանի աշխատանքային հանդիպումներ, որոնց միջոցով կարևոր համաձայնություններ են ձեռք բերվել՝ առաջնահերթ աշխատանքները կազմակերպելու տեսանկյունից: Սա անհրաժեշտ էր հատկապես այն պատճառով, որ ԲՇԽ-ին ներկայացված նախնական ուսումնասիրության առաջին նախագծում շատ հարցեր էին բաց մնացել, իսկ ժամանակը բավական սուղ էր: Դեռևս չի ներկայացվել նախնական ուսումնասիրության լրամշակված նախագիծը: Այդ հանդիպումները հնարավորություն տվեցին քննարկել նիստի օրակարգում ներառված աշխատանքների արդյունքները: Մասնավորապես.

- Արդյունահանող ճյուղերի թափանցիկության նախաձեռնության (ԱՃԹՆ) ներդրման գործընթացը կարգավորող և հաշվետվողականության մեխանիզմը պարտադիր նորմ սահմանող օրենքների նախագծերի փաթեթը,
- ԱՃԹՆ-ի հայաստանյան կայքի տեխնիկական առաջադրանքի նախագիծը,
- Իրական սեփականատերերի բացահայտման ճանապարհային քարտեզի և «իրական սեփականատեր» հասկացության սահմանման նախագծերը,
- ԱՃԹՆ-ի բաց տվյալների քաղաքականության հայեցակարգը, ԱՃԹՆ-ի եռամսյակային հաշվետվությունը և մի շարք այլ հարցեր:

**Դ. Հարությունյանը** ներկայացրեց նիստի օրակարգի հարցերը և առաջարկեց անցնել դրանց քննարկմանը: Նշվեց, որ ավարտվում է ՀՀ կառավարության և ԱՄՆ միջազգային զարգացման գործակալության համատեղ «Հանքարդյունաբերության ոլորտի թափանցիկության

բարելավում» ծրագիրը, և, ամփոփելով կատարված աշխատանքները, ծրագրի իրականացումը կարելի է համարել շատ հաջողված: Որպես ծրագրի արդյունք արդեն իսկ գործում է Հանրապետական երկրաբանական ֆոնդի [www.geo-fund.am](http://www.geo-fund.am) կայքը, որի միջոցով յուրաքանչյուրին հասանելի է ֆոնդի պահոցում պահպանվող ամբողջությամբ թվայնացված տեղեկատվությունը, ինչն այսօր էլ շարունակում է համալրվել Երկրաբանական ինստիտուտի արխիվի թվայնացվող նյութերով: Կայքն ունի բավականաչափ շատ այցելուներ, որոնց թիվը շարունակում է աճել: Ինչ վերաբերում է Հայաստանում ԱՃԹՆ-ի ներդրման աշխատանքների իրականացմանը՝ ծրագրի օգնությամբ հաջողվեց իրականացնել ԱՃԹՆ-ի թեկնածության հայտի ներկայացման համար պահանջվող պարտադիր նախապատրաստական քայլերը, ներկայացնել Հայաստանի հայտը և 2017թ. մարտին ԱՃԹՆ-ի խորհրդի կողմից ճանաչվել թեկնածու երկիր: Դ. Հարությունյանի կողմից հատուկ շնորհակալություն հայտնեց Լ. Շուշանյանին, ով հանդիսանում է գործընթացի շարժիչ ուժը: ՀՀ կառավարության, և Հայաստանի ԲՇԽ-ի անունից շնորհակալության խոսքեր փոխանցվեցին ԱՄՆ ՄՋԳ-ին:

Հայտարարվեց նաև, որ ՄԱԿ-ի զարգացման ծրագիրը պատրաստականություն է հայտնել միանալու ԱՃԹՆ-ի գործընթացն աջակցողների թիմին և ֆինանսավորելու Հայաստանի ԱՃԹՆ-ի պաշտոնական պորտալի ստեղծման աշխատանքները: Նախատեսվում է, որ Հայաստանի ԱՃԹՆ-ի պաշտոնական կայքը դառնալու է այն հարթակը, որում EITI-ի սկզբունքների և պահանջներին համապատասխան՝ հրապարակվելու է Հայաստանի մետաղական հանքարդյունաբերության և Հայաստանի ազգային զեկույցով ներկայացվող համապարփակ տեղեկատվությունը, ինչպես նաև ստեղծվելու է ԱՃԹՆ-ի զեկույցի համար հանքարդյունաբերող ընկերությունների և պետական մարմինների կողմից հաշվետվությունների ներկայացման առցանց համակարգ: Կայքը նաև հնարավորություն կտա օպերատիվ դարձնել հաշվետվությունների ներկայացումը և կունենա ցանկացած հաշվետվությունների ու տվյալների հետագծի (traceability) հնարավորություն: Կայքում ներկայացվող տեղեկատվությունը համապատասխանելու է բաց տվյալների սկզբունքներին:

**Նշվեց**, որ հանդիպմանը ներկա են ԱՄՆ ՄՋԳ հայաստանյան գրասենյակի տնօրեն Դեբորա Գրիգերը և Հայաստանում ՄԱԿ-ի զարգացման ծրագրի հայաստանյան գրասենյակի մշտական համակարգողի տեղակալ Դմիտրի Մարիասինը, որոնց էլ փոխանցվեց խոսքը:

---

## 2. Հյուրերի ողջույնի խոսք

**Դ. Գրիգորը** ողջունեց ԲՇԽ-ի անդամներին և հյուրերին՝ նշելով, որ ԱՃԹՆ-ի գործընթացը Հայաստանում վերջին մեկ տարում բավականաչափ առաջ է անցել. Հայաստանն այժմ թեկնածու երկիր է: Նշվեց, որ կառավարությունը, քաղաքացիական հասարակությունը և բիզնեսը միավորել են իրենց ջանքերը ԱՃԹՆ-ի ստանդարտի պահանջներին համապատասխանելու համար: Հայտարարվեց, որ ԱՄՆ ՄՁԳ և կառավարության աշխատակազմի հետ համատեղ իրականացվող «Հանքարդյունաբերության ոլորտի թափանցիկության բարելավում» ծրագիրը 2017թ. դեկտեմբերին կավարտվի: Համագործակցությունը գնահատվեց որպես շատ հաջող. մեծ առաջընթաց է արձանագրվել հանքարդյունաբերության ոլորտում թափանցիկության և հաշվետվողականության հարցերին անդրադառնալու առումով: Հայտարարվեց, որ ԱՄՆ կառավարությունը կշարունակի աջակցել Հայաստանում ԱՃԹՆ-ի գործընթացին՝ քաղաքացիական հասարակության աջակցության ծրագրի միջոցով՝ հզորացնելով քաղաքացիական հասարակության դերը ԱՃԹՆ-ի ներդրման գործընթացում և նպաստելով հանքարդյունաբերության ոլորտի ու ԱՃԹՆ-ի ավելի լավ լուսաբանմանը լրատվամիջոցների կողմից:

**Դ. Մարիասինը** նշեց, որ ՄԱԿ-ի զարգացման ծրագիրը ամբողջ աշխարհում սերտորեն համագործակցում է ԱՃԹՆ-ի հետ: Հայաստանում մինչև այժմ ՄԱԿ-ի զարգացման ծրագիրը ուղղակիորեն ներգրավված չի եղել ԱՃԹՆ-ի գործընթացում, թեև ԱՃԹՆ-ի շրջանակներում աջակցություն է ցուցաբերվել ՀԱՀ ՊՀԿ-ին 2015-ին, որոշակի աշխատանք է տարվել՝ Սյունիքում ռիսկերի պրոֆիլավորման հետ կապված (Աղետների ռիսկերի նվազեցման ԵՄ կողմից ֆինանսավորվող աշխատանքների շրջանակներում): Հայտարարվեց, որ ՄԱԿ-ի զարգացման ծրագիրը կֆինանսավորի Հայաստանի ԱՃԹՆ-ի կայքի ստեղծման աշխատանքները, և հույս հայտվեց, որ համագործակցությունը երկարաժամկետ կլինի: Նշվեց, որ կայքի տեխնիկական առաջադրանքը մշակված է, և շուտով կհայտարարվի կայքի ստեղծման մրցույթը:

**Դ. Հարությունյանն** առաջարկեց անցնել նիստի օրակարգի հաջորդ կետերին:

**3. ԱՃԹՆ-ի ներդրման շրջանակներում առաջարկվող օրենսդրական փոփոխությունների նախագծի ներկայացում և հաստատում**

**Վ. Գևորգյանը** հակիրճ ներկայացրեց օրենսդրական նախագծերի փաթեթը, որով փոփոխություններ են առաջարկվում «ՀՀ ընդերքի մասին օրենսգրքում», «ՀՀ հարկային օրենսգրքում» և «Տնտեսական մրցակցության պաշտպանության մասին» ՀՀ օրենքում, ինչպես նաև «Վարչական իրավախախտումների վերաբերյալ» ՀՀ օրենսգրքում: Նախագիծը նախապես տրամադրվել էր ԲՇԽ-ի անդամներին կարծիքների համար: Նշվեց, որ նախագծի շուրջ բազմաթիվ աշխատանքային քննարկումներ են տեղի ունեցել՝ ԲՇԽ-ի, շահագրգիռ գերատեսչությունների, ինչպես նաև միջազգային գործընկերների մասնակցությամբ:

Հայտնվեց, որ փոփոխությունները կատարվել են՝ ելնելով Հայաստանի՝ ԱՃԹՆ-ի անդամակցության պահանջներից: Մասնավորապես, ԱՃԹՆ-ի անդամակցող երկրները պարտավորվում են հրապարակել ամենամյա զեկույցներ, որոնք պարունակում են համապարփակ տեղեկություն՝ պետության կողմից տրված ընդերքօգտագործման թույլտվությունների, հանքարդյունաբերական ընկերությունների արդյունահանման ծավալների, նրանց վճարված հարկերի և վճարների, ոլորտից ստացված եկամուտների տեղաբաշխման, ինչպես նաև սոցիալական ծրագրերի իրականացման վերաբերյալ: Նշվեց, որ նախագիծը գտնվում է քննարկման փուլում, և դեռևս առկա է փոփոխություններ կատարելու հնարավորություն:

**Նկատառում արվեց** այն մասին, որ ներկայացված օրենսդրական փոփոխությունների փաթեթը ԱՃԹՆ-ի ներդրման շրջանակներում պահանջվող օրենսդրական փոփոխությունների սպառիչ փաթեթ չէ: Նշվեց, որ փաթեթը խիստ մասնակի է, և չի ծածկում ԱՃԹՆ-ի ստանդարտի ու ստանդարտի համաձայն մշակված աշխատանքային ծրագրով նախատեսվող հնարավոր օրենսդրական փոփոխությունները: Հայտարարվեց նաև, որ բաց է մնում պատախանատու հանքարդյունաբերության մասը, քանի որ առաջարկվող փոփոխությունները չեն ենթադրում ամբողջական ծավալ, և դեռ մեծ ծավալի աշխատանք կա կատարելու:

**Դ. Հարությունյանը** համաձայնվեց նկատառման հետ՝ նշելով, որ ծանոթ չէ որևէ օրենսդրության, որը գալիս է կարծրացած և չի ենթադրում հետագայում փոփոխություններ, լրամշակումներ: Այլ օրենսդրական

մշակումների հետ կապված՝ նշվեց, որ ԲՇԽ-ի անդամներից յուրաքանչյուրն ազատ է ներկայացնել առաջարկություններ, որոնք կարող են խմբի քննարկման առարկա դառնալ:

**Հարց բարձրացվեց**, թե արդյոք օրենսդրական փոփոխությունների նախագիծը կհայտնվի [www.edraft.am](http://www.edraft.am) կայքում, ինչին ի պատասխան նշվեց, որ նախագիծն արդեն իսկ առկա է նշված կայքում:

**Հարց բարձրացրեց՝** պայմանագրերի հրապարակման շրջանակներում արդյոք հրապարակվելու են միայն ընդերքօգտագործման պայմանագրի համարը և կնքման ամսաթիվը: Հարցին պատասխանելով՝ **Վ. Գևորգյանը** նշեց, որ հրապարակվելու է պայմանագիրն ամբողջությամբ՝ ներառյալ հավելվածները:

ԱՃԹՆ-ի ներդրման շրջանակներում առաջարկվող օրենսդրական փոփոխությունների նախագիծը ներկայացվեց ԲՇԽ-ի հաստատմանը և **ընդունվեց** ԲՇԽ-ի ընդհանուր համաձայնությամբ (կոնսենսուսով):

---

#### **4. ԱՃԹՆ-ի հայաստանյան կայքի տեխնիկական առաջադրանքի ներկայացում և հաստատում**

**Դ. Շինդյանը** ներկայացրեց ԱՃԹՆ-ի հայաստանյան կայքի տեխնիկական առաջադրանքի նախագիծը, որը նախապես տրամադրվել էր ԲՇԽ-ի անդամներին կարծիքների տրամադրման համար: Նշվեց, որ ստացված կարծիքները ամփոփվել և ներառվել են նախագծի մեջ: Նշվեց, որ կայքը պետք է ապահովի առավելագույն համապատասխանելիություն գոյություն ունեցող հիմնական որոնման ծրագրային փաթեթների հետ, ինչպիսիք են Internet Explorer, Mozilla Firefox, Opera, Safari, Chrome և այլն: Կայքը պետք է լինի եռալեզու (հայերեն, ռուսերեն և անգլերեն), ինչպես նաև կայքի ցանկացած էջի ներքևում պետք է տեղադրվի հատուկ մոդուլ, որը հնարավորություն կտա տարածել տրված էջը սոցիալական ցանցերում (Facebook, Twitter, Live Journal, GOXI, Youtube և այլն): Ներկայացվեց նաև կայքի մոտավոր կառուցվածքը՝ ԱՃԹՆ-ի մասին (ինչ է ԱՃԹՆ-ը, նախաձեռնությանը միանալու օգուտները, ԱՃԹՆ-ի սկզբունքները), ԱՃԹՆ-ի հայաստանյան գործընթացը, ԱՃԹՆ-ի փաստաթղթերը (աշխատանքային ծրագրեր և ուսումնասիրություններ), ԲՇԽ-ի մասին: Կայքում կլինի նաև մեդիա կենտրոն, որտեղ կտեղադրվեն ԱՃԹՆ-ին վերաբերող նորությունները, լուսանկարները և հոլովակները: Կայքը կունենա նաև ԱՃԹՆ-ի հաշվետվությունների ներկայացման առցանց

հարթակ, որը նախատեսված կլինի ինչպես հանքարդյունաբերական ընկերությունների, այնպես էլ պետական մարմինների համար:

**Հարց բարձրացվեց՝** արդյոք կայքը նախատեսում է հանքարդյունաբերությանն առնչվող խնդիրների լուսաբանում՝ ֆորումի տեսքով:

**Նշվեց,** որ կայքի նպատակը ԱՃԹՆ-ին վերաբերող հաշվետվությունները և հանքարդյունաբերությանը վերաբերող բուն գործընթացներն են, և կայքը պետք է միտված լինի նյութերը հեշտությամբ հայթհայթելուն:

**Նշվեց նաև,** որ բաց տվյալների քաղաքականության շրջանակում տվյալները պետք է հնարավորինս մատչելի լինեն օգտագործողի համար, որը նաև ենթադրում է հետադարձ կապի (feedback) ապահովում օգտագործողի հետ: Կայքի հետադարձ կապի պատասխանատուն ոչ միայն ԱՃԹՆ-ի քարտուղարությունը կլինի, այլև ԲՇԽ-ի անդամները:

**Հարց բարձրացվեց,** թե արդյոք բոլոր հաշվետվությունները առանց գրաքննության տեղադրվելու են կայքում, թե քարտուղարությունը ֆիլտրելու է. խոսքը վերաբերում է դրսի կազմակերպությունների կողմից արված ուսումնասիրություններին: **Լ. Թովմասյանը** պատասխանեց, որ քարտուղարությունը հաշվետվությունները ֆիլտրելու իրավասություն չունի, և դրսի կազմակերպությունների կողմից մշակված հաշվետվությունները կայքում տեղադրելու վերաբերյալ որոշումը ԲՇԽ-ն պետք է կայացնի:

ԱՃԹՆ-ի հայաստանյան կայքի տեխնիկական առաջադրանքի նախագիծը ներկայացվեց ԲՇԽ-ի հաստատմանը և **ընդունվեց** ԲՇԽ-ի ընդհանուր համաձայնությամբ (կոնսենսուսով): Դ. Հարությունյանը խնդրեց, որ կայքի դիզայնի առաջին տարբերակը ունենալուց հետո դա ներկայացնել ԲՇԽ-ին:

---

## **5. ՀՀ ԱՃԹՆ-ի ներդրման աշխատանքների 3-րդ եռամսյակի հաշվետվության ներկայացում և հաստատում**

**Լ. Շուշանյանի** կողմից ներկայացվեց ՀՀ ԱՃԹՆ-ի ներդրման աշխատանքների 2017 թվականի 3-րդ եռամսյակի հաշվետվության նախագիծը, որը նախապես տրամադրվել էր ԲՇԽ-ի անդամներին կարծիքների տրամադրման համար: Եռամսյակային հաշվետվության մեջ զետեղված են 2017 թվականի հուլիս-սեպտեմբեր ամիսներին իրականացված աշխատանքները՝ համաձայն ՀՀ ԱՃԹՆ-ի 2017-2018թթ. աշխատանքային ծրագրով հաստատված միջոցառումների: Հաշվետու ժամանակահատվածում աշխատանքային ծրագրով սահմանված մի շարք աշխատանքներ են իրականացվել, մասնավորապես, որոշակի



աշխատանքներ են կատարվել 2018թ. ԱՃԹՆ-ի զեկույցի նախնական ուսումնասիրության, օրենսդրական վերլուծության, հանրային ռազմավարության նախագծերի մշակման ուղղությամբ: Նշված փաստաղթերի մշակումը պատվիրակվել է ՀԱՀ ՊՀԿ-ին (ՄԹ դեսպանատան կողմից ֆինանսավորվող ծրագրի շրջանակներում): Մշակվել է նաև իրական սեփականատերերի բացահայտման և օրենսդրական ուսումնասիրության իրականացման նպատակով փորձագետների ներգրավման տեխնիկական առաջադրանքը (ՎՋԵԲ-ի կողմից ֆինանսավորվող ծրագրի շրջանակներում): Համաշխարհային բանկից ֆինանսավորում ստանալու նպատակով մշակվել է հայտադիմում և ներկայացվել է Համաշխարհային բանկ: Տեղի է ունեցել Հանրապետական երկրաբանական ֆոնդի կայքի շնորհանդեսը: «Հրապարակում» հաղորդաշարի 2 հաղորդում հեռարձակվել Հանրային հեռուստաընկերության եթերում: ԱՃԹՆ-ի գործընթացը լուսաբանելու նպատակով հոլովակներ պատրաստելու նպատակով մրցույթ է անցկացվել, և ընտրվել է «Ալտերա» ընկերությունը: ԱՃԹՆ-ի քարտուղարության և անդամավճարի ֆինանսավորման նպատակով 2018թ. բյուջետային հայտ է մշակվել:

**Առաջարկվեց**, որ մշակվի եռամսյակային հաշվետվության նոր ձևաչափ: Նշվեց, որ ՀՀ ԱՃԹՆ-ի 2017-2018թթ. աշխատանքային ծրագիրն ավելի լայն է, քան ԱՃԹՆ-ի ստանդարտը, և հաշվետվությունը պետք է կազմված լինի 2017-2018թթ. աշխատանքային ծրագրում ամրագրված գործողություններից՝ նշելով, թե որքանով են իրականացվել գործողությունները:

**Հարցին ի պատասխան՝ հայտարարվեց**, որ հաշվետվությունները կազմվում են՝ համաձայն աշխատանքային ծրագրի կետերի: Տվյալ ժամանակահատվածում ձեռքբերված բոլոր արդյունքները ներառվում են հաշվետվության մեջ: Հաշվետվության ձևաչափի մասով առաջարկվեց նոր ձևաչափ մշակել և ներկայացնել ԱՃԹՆ-ի քարտուղարությանը: Նշվեց, որ տարեկան հաշվետվությունը պատրաստելու ժամանակ յուրաքանչյուր խմբակցություն պետք է ներկայացնի իր խմբակցության կատարած աշխատանքը:

**Նշվեց**, որ համաձայն մինչ այդ գոյություն ունեցող գործելաոճի՝ ԲՇԽ-ի հանդիպումները կազմակերպում է ԱՃԹՆ-ի քարտուղարությունը, սակայն ինքը պատասխաստվում է կազմակերպել պատասխանատու հանքարդյունաբերության աշխատանքային խմբի հանդիպում:

**Առաջարկվեց**, եռամսյակային հաշվետվության մեջ նշել հաշվետու ժամանակահատվածի համար նախատեսված միջոցառումների չիրականացման պատճառները:

**Նշվեց**, որ գործողությունների կատարման և կատարված աշխատանքների որակի հետ կապված խնդիրներ չկան:

**Որոշվեց**, որ երկու շաբաթվա ընթացքում (մինչև դեկտեմբերի 20-ը) եռամսյակային հաշվետվության ձևաչափի վերաբերյալ առաջարկություններ պետք է արվեն և շրջանառվեն ԲՇԽ-ի անդամների միջև, ինչպես նաև մինչև դեկտեմբերի 20-ը յուրաքանչյուր խմբակցություն ներկայացնի իր կողմից կատարված աշխատանքների հաշվետվությունը:

**Հարց բարձրացվեց**, թե արդյոք հնարավոր է մինչև տարեվերջ կազմակերպել ևս մեկ հանդիպում՝ եռամսյակային հաշվետվության խնդիրների պարզաբանման նպատակով: **Որոշվեց**, որ եռամսյակային հաշվետվության նոր ձևաչափի (ձևաչափերի) շրջանառումից հետո, կախված քննարկման նյութի առկայությունից, որոշվի՝ ձևաչափը հաստատել էլեկտրոնային եղանակով կամ կազմակերպել ԲՇԽ-ի հանդիպում: Խմբակցության հաշվետվությունները ներկայացվելու են քաղաքացիական հասարակության խմբակցությունից՝ Հ. Մովսիսյանը, ընկերությունների խմբակցությունից՝ Վ. Վարդանյանը և կառավարության խմբակցությունից՝ Վ. Գևորգյանը:

ՀՀ ԱՃԹՆ-ի ներդրման աշխատանքների՝ 2017 թվականի 3-րդ եռամսյակի հաշվետվության նախագիծը ներկայացվեց ԲՇԽ-ի հաստատմանը և **ընդունվեց** ԲՇԽ-ի ընդհանուր համաձայնությամբ (կոնսենսուսով):

---

## **6. ԱՃԹՆ-ի բաց տվյալների քաղաքականության հայեցակարգի ներկայացում և հաստատում**

**Լ. Թովմասյանը** ներկայացրեց ԱՃԹՆ-ի բաց տվյալների քաղաքականության հայեցակարգի նախագիծը: Համաձայն հայեցակարգի՝ ՀՀ ԱՃԹՆ ԲՇԽ-ն սահմանում է Հայաստանում ԱՃԹՆ-ի իրականացման շրջանակում բաց տվյալների սկզբունքի իրականացման սկզբունքները և հայտնում իր հանձնառությունը հետևողական լինելու դրանց իրականացմանը: Սկզբունքի կիրառումը դիտարկվում է ԱՃԹՆ-ի տարեկան զեկույցների հրապարակմանը զուգընթաց, և ԱՃԹՆ-ի շրջանակներում հաշվետու կազմակերպություններին չի պարտավորեցնում կիրառել այն, սակայն, տվյալներ հրապարակելիս, ԱՃԹՆ-ի շահագրգիռ կողմերը խրախուսվում են առաջնորդվել բաց տվյալների սկզբունքով: Հայեցակարգը նախատեսում է նաև, որ ԱՃԹՆ-ի կայքում ներկայացվող տվյալները պետք է ունենան վերաօգտագործման հնարավորություն և տեղադրվեն xls ու csv ֆորմատներով:

**Որոշվեց**, որ xls ու csv ֆորմատներով տեղեկատվությունը գետեղելուց բացի, տվյալները տեղադրել նաև doc ֆորմատով:

ԱՃԹՆ-ի բաց տվյալների քաղաքականության հայեցակարգի նախագիծը ներկայացվեց ԲՇԽ-ի հաստատմանը և **ընդունվեց** ԲՇԽ-ի ընդհանուր համաձայնությամբ (կոնսենսուսով):

---

**7. Նախնական ուսումնասիրության, հանրային հաղորդակցության ռազմավարության և օրենսդրական դաշտի ուսումնասիրության հետ կապված խնդիրների ներկայացում և քննարկում**

**Կ. Ուլբրիխտը, Դ. Հակոբյանը և Լ. Մուրադյանը** ներկայացրին նախնական ուսումնասիրության, հանրային հաղորդակցության ռազմավարության և օրենսդրական դաշտի ուսումնասիրության հետ կապված խնդիրները:

**Որոշվեց՝** վերոնշյալ նախագծերի ներկայացման հետևյալ վերջնաժամկետները.

- նախնական ուսումնասիրության վերջնական նախագիծ՝ դեկտեմբերի 11,
- հանրային հաղորդակցության ռազմավարության նախագիծ՝ դեկտեմբերի 19,
- օրենսդրական դաշտի ուսումնասիրության նախագիծ՝ դեկտեմբերի 11:

**Հիշեցվեց** նաև, որ անհրաժեշտ է աշխատանքներ իրականացնել անկախ ադմինիստրատորի տեխնիկական առաջադրանքի նախագծի մշակման, ինչպես նաև տեխնիկական առաջադրանքներում ընդգրկված այլ խնդիրների ուղղությամբ:

**Նշվեց**, որ պատասխանատու հանքարդյունաբերության միջազգային փորձի ուսումնասիրությունը և ինստիտուցիոնալ-օրենսդրական դաշտի բարելավման ուղղությամբ առաջարկները դուրս են մնում ՀԱՀ ՊՀԿ աշխատանքներից: **Պատասխան տրվեց**, որ ՀԱՀ ՊՀԿ-ի աշխատանքներից այդ հատվածը դուրս չի մնում, և ՀԱՀ ՊՀԿ-ն պետք է մշակի նախնական ճանապարհային քարտեզ, որը հետագայում կարող է լրամշակվել: **Նշվեց**, որ ԲՇԽ-ի աշխատանքային խմբերը, որպես այդիպիսին, չեն կայացել: **Առաջարկվեց՝** սպասել ՀԱՀ ՊՀԿ-ի կողմից մշակված նյութերին, այնուհետև կայացնել որոշում:

---

**8. Իրական սեփականատերերի բացահայտման ճանապարհային քարտեզի նախագծի և իրական սեփականատիրոջ սահմանման քննարկում**

Մինչև 2018 թվականի հունվարի 1-ը պետք է հրապարակվի Հայաստանի Հանրապետության մետաղական հանքարդյունաբերության ոլորտում գործող կազմակերպությունների իրական սեփականատերերի

բացահայտման ճանապարհային քարտեզը: Քարտեզի մշակման աշխատանքներին Հայաստանի Հանրապետությանը օժանդակություն է ցուցաբերել Վերակառուցման և զարգացման եվրոպական բանկը, որի շնորհիվ միջազգային և տեղական խորհրդատուներ Ջերեմի Ուիթն ու Դավիթ Սարգսյանը, համագործակցելով ԲՇԽ-ի, Հայաստանի ԱՃԹՆ-ի ազգային քարտուղարության և այլ շահագրգիռ կողմերի հետ, ներկայացրել են իրավական դաշտի ուսումնասիրություն և իրական սեփականատերերի բացահայտման ճանապարհային քարտեզի և ժամանակացույցի, այդ թվում՝ իրական սեփականատիրոջ սահմանման նախագծերը: Նիստին իրական սեփականատերերի բացահայտման հարցերով խորհրդատու **Դ. Սարգսյանը** ներկայացրեց կատարված աշխատանքները: **Առաջարկվեց՝** քննարկել իրական սեփականատիրոջ սահմանման նախագիծը և համաձայնության գալ մի շարք դրույթների վերաբերյալ: Նշվեց, որ Հայաստանի Հանրապետությունում առկա է բավական մեծ փորձ, հատկապես բանկային ոլորտում, որը վերաբերում է իրական շահառուի բացահայտմանը: Փողերի լվացման և ահաբեկչության ֆինանսավորման դեմ պայքարի օրենսդրությունը նույնպես սահմանում է իրական շահառուի բացահայտման պահանջ, որը հիմնված է միջազգային ստանդարտների վրա: Հանքարդյունաբերության ոլորտը կարգավորող իրավական ակտերում նույնպես առկա է ընդերքօգտագործման թույլտվության հայտ ներկայացնող կազմակերպությունների համար 10 տոկոսից ավելի բաժնետերերի բացայատման առաջնային պահանջ, որը, սակայն, չի պահանջում ֆիզիկական անձի՝ որպես վերջնական սեփականատիրոջ բացահայտում: Իրավաբանական անձի սկզբնական գրանցման ժամանակ նույնպես սահմանված են բաժնետերերի բացահայտման պահանջներ: Իրական սեփականատիրոջ առաջարկվող սահմանման մեջ ամենակարևոր հարցերից է բացահայտման շեմի որոշումը: Խորհրդատուն ներկայացրեց, որ նախագծով առաջարկվել է 20 տոկոս շեմ, քանի որ Հայաստանի Հանրապետությունում, մասնավորապես, հանքարդյունաբերության ոլորտում սովորաբար 20 տոկոսից բարձր սեփականատիրության դեպքում է, որ սեփականատերը ունենում է որոշումների կայացման վրա ազդեցություն: 20 տոկոսից ցածր սեփականության դեպքում սեփականատերը սովորաբար պասիվ ներդրող է և որոշումների կայացման վրա ազդեցություն չի ունենում: Անուղղակի կերպով տիրապետման կամ հսկողության պարագայում՝ պայմանագրային հարաբերությունների հիման վրա կամ այլ կերպ շահույթին տնօրինելու դեպքերում առաջարկվել է բացահայտման համար 15 տոկոս շեմի

սահմանում: Ըստ նախագծի՝ քաղաքական ազդեցություն ունեցող անձինք պետք է բացահայտվեն՝ անկախ մասնակցության չափից: Քննարկումների արդյունքում **առաջարկվեց՝** չփոփոխել գործող օրենսդրության պահանջները և սահմանել իրական սեփականատիրոջ բացահայատման 10 տոկոս շեմ, որը կապահովի առավել բարձր թափանցիկություն: Թեև նշվեց, որ առկա 10 տոկոս շեմը պարտադիր չի վերաբերում ֆիզիկական անձանց, և դրանով իսկ 10 տոկոսի սահմանումը նշանակում է առկա պահանջի խստացում: ԲՇԽ-ն ընդհանուր համաձայնությամբ **ընդունեց** առաջարկությունը:

Հարց բարձրացվեց, թե սկզբնական շրջանում ինչ շրջանակում է իրականացվելու իրական սեփականատերերի բացահայտումը: Առաջարկվեց, որ 2020 թվականից բացահայտվեն Հայաստանի Հանրապետությունում մետաղական օգտակար հանածոյի արդյունահանման թույլտվություն ստացած կազմակերպությունների իրական սեփականատերերը: Նշվեց, որ, եթե գործընթացը հաջող ընթանա, ապա այդ փորձը կարող է օգտագործվել նաև այլ ոլորտներում: **Առաջարկվեց՝** քննարկել օգտակար հանածոների արդյունահանման նպատակով ընդերքի երկրաբանական ուսումնասիրության թույլտվություն ստացած կազմակերպությունների ընդգրկման հարցը, քանի որ այս ենթաօլորտը նույնպես գտնվում է քաղաքացիական հասարակության ուշադրության կենտրոնում: Ի պատասխան նշվեց, որ առավել կարևոր է այն կազմակերպությունների իրական սեփականատերերի բացահայտումը, որոնք ոլորտում օգտակար հանածոների արդյունահանումից շահույթ են ստանում: Ուսումնասիրության թույլտվություն ստացած իրավաբանական անձինք իրենց գործունեության արդյունքում շահույթ չեն ստանում, միայն կատարում են ներդրումներ (ծախսեր): Ամեն դեպքում, երբ ընդերքի երկրաբանական ուսումնասիրության թույլտվություն ստացած կազմակերպությունը հայտ կներկայացնի մետաղական օգտակար հանածոյի արդյունահանման թույլտվություն ստանալու համար, այս դեպքում այն պարտադիր կերպով ստիպված կլինի բացահայտել իր իրական սեփականատերերին: Կարծիք հայտնվեց, որ ռիսկեր գոյություն ունեն նաև ընդերքի երկրաբանական ուսումնասիրության թույլտվությունների դեպքում և ճանապարհային քարտեզում անհրաժեշտ է անդրադարձ կատարել այս թույլտվությունների տիրապետողներին: Տեղեկացվեց նաև, որ համաձայն երկրում իրականացվող բարեփոխումների, 2020-2024 թվականներին իրավաբանական անձանց պետական գրացման ռեգիստրի հարթակի հիման վրա բոլոր ոլորտներում

պետք է իրականացվի սեփականատերերի բացահայտում: Բազմաշահառու խմբի քննարկման արդյունքում **որոշվեց**, որ սկզբնական շրջանում (2020 թվականին) բացահայտվելու են մետաղական օգտակար հանածոյի արդյունահանման թույլտվություն ստացած կազմակերպությունների իրական սեփականատերերը, իսկ իրական սեփականատերերի բացահայտման ճանապարհային քարտեզի նախագծում պետք է ներառել միջոցառում, ըստ որի ԲՇԽ-ն կիրականացնի քննարկում կամ ուսումնասիրություն, որի արդյունքում կորոշվեն իրական սեփականատերերի բացահայտման շրջանակի ընդլայնման, այլ ենթաուղորտների ներառման հարցերը և ժամանակացույցը:

**Որոշվեց** նաև՝ իրական սեփականատերերի կամավոր բացահայտումը չներառել ԱՃԹՆ-ի 1-ին և 2-րդ թվականներին հրապարակվելիք զեկույցներում: Որպես հիմնավորում նշվեց մի քանի պատճառ. միջազգային փորձը ցույց է տալիս, որ կամավոր բացահայտման գործընթացը ԱՃԹՆ-ի զեկույցներում այն իրականացնող երկրներում արդյունավետ չի եղել, Հայաստանի 1-ին զեկույցի կազմման համար սահմանված են սահմանափակ ժամկետներ, իսկ 2019 զեկույցում կամավոր բացահայտման պարագայում կազմակերպությունները ստիպված կլինեն 2 անգամ ներկայացնել հայտարարագրեր՝ կամավոր՝ ԱՃԹՆ-ի զեկույցի համար, այնուհետև, մի քանի ամիս անց, պարտադիր՝ 2020թ. իրավաբանական անձանց ռեգիստրում հրապարակման համար: Այս գործընթացը կարող է ավելացնել գործարարների ծախսային բեռը, ինչպես նաև ժամանակ չի լինի դասեր քաղելու և համակարգում շտկումներ կատարելու համար:

Քննարկված հարցերի հետ կապված, որոշվեց լրամշակել իրական սեփականատերերի բացահայտման ճանապարհային քարտեզի և իրական սեփականատիրոջ սահմանման նախագծերը՝ համաձայն կայացված որոշումների, և այն առաջիկա շաբաթվա ընթացքում ներկայացնել ԲՇԽ-ի խմբակցությունների կարծիքի: